

Noto. Fo divulgato, ma *secrete* perchè in Pregadi non hanno nulla, come si trattava una nova liga, Papa, Franza, la Signoria nostra et sguizari, con questo il re di Franza dagi la seconda fiola al duca presente di Milan e li ciedi le raxon dil ducato in dota, et la Signoria abi tutto il suo Stado l'avia prima, da Cremona in fuora, e le terre di Romagna di la Chixia; ma ben le terre di Puia, e cazar spagnoli de Italia, qual al presente sono quelli la domina.

Item, è da saper, il conte di Cariat, fo orator qui, ritornò da Napoli al vicerè, et par *ut dicitur* sia andato a l'Imperador.

249* *Di Spagna, di l'orator nostro, di 29 Novembrio.* Replica coloqui auti col Re, qual dice aver scritto si fazi l'acordo *pro locuto* si nò come se puol, e persuade la Signoria a voler aquiescere etc. *Item*, il Re mostra esser amico nostro. *Item*, è venuto tre noncii con letere dil principe di Castiglia, che è in Borgogna, vol venir nel suo reame certissimo per questo.

Di Franza, dil Dandolo orator nostro, di 7, da Bles. Come l'acordo si trattava con sguizari par sia andato in fumo, *imo* il general di Borgogna, che andava orator dil Roy a' sguizari et li havia mandà a dimandar salvoconduto di andar et era reduto in Savoia, *unde* sguizari tene il suo messo in parole et lo mandoe a retenir e condurlo in le terre loro. I qual sguizari par non voglino aldir Franza se prima non renencia la ducea di Milan a loro, iusta li capitoli fonno facti; per il che el Re manda gran exercito in Borgogna contra essi sguizari che cegnano voler venir, et farà lanze 1200 ivi et lanzinechi 10 milia, oltra quelli dil duca di Geler; *etiam* nel Dolfinà manda zente *ut in litteris*.

Fu posto, per li savii, elezer deputati, uno provedador zeneral in la Patria dil Friul, con 8 cavali ducati 80 per spexe al mexe, e sia tenuto partir *immediate*; et fu presa.

Fu posto, per consieri, atento le cose occorrenti, di elezer tre savii di zonta al Colegio per mexi tre, dil Consejo, *ut in parte*, presa.

250 Fu fato il scurtinio di tre savii dil Consejo ordinarii in luogo di sier Zorzi Emo, sier Zorzi Corner cavalier procurator, e sier Andrea Griti che compieno e tolti N. . . . rimaseno sier Antonio Grimani procurator, 122, sier Piero Balbi fo savio dil Consejo, 117, sier Domenego Trivixan cavalier procurator, 113, sier Tomà Mozenigo procurator et sier Zacaria Dolfin, 91, sier Lunardo Mozenigo, 82, sier Antonio Trun procurator, 71, sier Piero Capelo el cavalier. Tutti questi hanno titolo di savii dil

Consejo. *Item*, sier Piero Lando orator a Roma, 79, e altri. *Item*, feno scurtinio di tre savii di terraferma, in luogo di sier Gasparo Malipiero, sier Marco Minio e sier Piero Trun, che compiono, et rimaseno sier Marin Zorzi dottor, 124, sier Alvixe Pixani *dal banco*, 129, sier Lorenzo Capelo qu. sier Zuan procurator, 122, tutti tre hanno titolo, sier Vettor Foscarini fo savio a terraferma, 116, poi sier Hironimo Grimani è di Pregadi, di sier Antonio procurator, 112, e sier Hironimo Zustinian fo di Pregadi, qu. sier Antonio, 108, per gran procure questi do. Hanno fato poi, 103, sier Antonio Condolmer, fo savio a terraferma; fo tolti *etiam*: 66 sier Alvise Mozenigo el cavalier, fo savio a terraferma, 63 sier Sebastian Zustinian el cavalier, fo savio a terraferma, et sier Piero Pasqualigo, dottor, cavalier, 94; lo Marin Sannudo fui nominato.

Poi fo fato scurtinio di 3 savii dil Consejo di zonta, iusta la parte, et pasono solo do, sier Zorzi Corner cavalier procurator, savio dil Consejo, 121, sier Zacaria Dolfin, fo savio dil Consejo 113, solo; ma non passò il terzo, sier Anzolo Trivixan, fo capitano a Padoa, 95 si et 95 no, sier Antonio Trun procurator, 94 si, 100 no, et sier Zorzi Emo savio dil Consejo, sier Piero Capelo, fo savio dil Consejo, et sier Polo Capelo el cavalier fo savio dil Consejo, sier Piero Lando.

Item, feno scurtinio di provedador zeneral in Friul. Tolti N. 13, rimase sier Zuan Veturi fo provedador zeneral in Friul, qu. sier Daniel; ave 12 di no, el qual era in Pregadi et accettò e andò. Il scurtinio sarà qui avanti posto. Veneno zoso hore 3 1/2.

Scurtinio di provedador zeneral in Friul, 250 con ducati 80 al mexe.*

Sier Lunardo Emo, è di Pregadi, qu.
sier Zuane el cavalier 48.144

Sier Zuan Antonio Dandolo, fo a le Razon Nuove, fo a la custodia di Padoa con homeni 10 a so' spexe, qu.
sier Francesco 60.132

Sier Zustinian Moroxini, fo provedador in campo, qu. sier Marco 51.143

† Sier Zuan Vituri, fo provedador in Friul qu. sier Daniel 132. 53

Sier Piero Marcelo, fo provedador zeneral in campo, qu. sier Giacomo Antonio el cavalier 90. 97

Sier Daniel Dandolo, fo provedador a Feltre, qu. sier Hironimo 43.148